

Nik Aziz sokong hantar pulang rakyat asing langgar peraturan

KOTA BHARU 20 Jan. 1 Menteri Besar Kelantan, Datuk Nik Abdul Aziz Nik Mat menyokong kenyataan Perdana Menteri, Datuk Seri Dr. Mahathir Mohamad kepada rakyat asing agar balik ke negara mereka kalau enggan mematuhi undang-undang dan peraturan negara ini.

Beliau berkata, setiap rakyat asing yang datang mencari makan di negara ini mesti mematuhi dan menghormati undang-undang negara ini.

"Saya sokong peringatan Perdana Menteri itu. Cari makan cari makanlah tetapi jangan langgar tuan rumah. Buat perangai tak elok wajar dihalau balik. Kalau datang sebagai tetamu patuhlah peraturan,"katanya kepada pemberita di sini hari ini.

Beliau berkata demikian ketika diminta mengulas kenyataan Perdana Menteri yang kesal dengan perbuatan merusuh oleh lebih 500 pekerja Indonesia kelmarin sambil mengingatkan rakyat asing supaya meninggalkan Malaysia jika merasakan negara ini tidak baik bagi mereka.

Nik Abdul Aziz berkata, sepatutnya rakyat asing yang diberi peluang bekerja di negara ini berterima kasih kepada kerajaan negara ini dan bukan membuat kacau bilau.

"Kita pergi ke Arab Saudi, kita patuh undang-undang negara itu begitu juga rakyat asing yang datang mencari makan di negara ini kena patuh peraturan negara ini," tegasnya.